

四庫全書

子部

欽定四庫全書

子部
冊府元龜卷三百十五
六

詳校官中書_臣王鵬

員外郎_臣牛檢文覆勘

總校官庶吉士_臣何思鈞

校對官助教_臣卜維吉

謄錄監生_臣戴琬

欽定四庫全書

冊府元龜卷

三百十五

宋

王欽若等

撰

宰輔部

公也

詩曰我心匪石不可轉也傳曰死而利國猶或為之公
忠之謂矣蓋策名委質抱公滅私臣之道也憂國忘家
有死無貳臣之節也若乃居丞宰之重裁邦國之政而
能義均休戚節貫屯夷至公以滅私純心而無驕彌綸

闕漏啓納而盡忠扶持顛危周旋而匪懈中立之操至累而益明惻款之誠難至而易見宣股肱之力為社稷之臣亦何代無其人哉自非明允篤誠經德秉括服膺善道不為利疚者孰能與於斯邪

殷伊尹為相帝太甲既立三年不明暴虐不遵湯法亂

德於是伊尹放之於桐宮

地名有王離宮焉

三年伊尹攝政事

當國以朝諸侯太甲居桐宮三年悔過自責反善於是伊尹乃迎太甲而授之政太甲修德諸侯咸歸殷百姓

以寧伊尹嘉之迺作太甲訓三篇褒帝太甲稱太宗伊

陟為相時殷道衰諸侯或不至太戊立伊陟贊言於巫

咸贊告也巫咸臣名也

巫咸治王家有成殷復興諸侯歸之故稱

中宗

周公旦佐武王克商二年天下未集武王有疾不豫羣

臣懼太公召公乃穆卜周公曰未可以戚我先王

戚近也未

可以死近先王也又曰二公就文王廟卜戚憂也未可憂怖我先王也

周公於是乃自以

為質設三壇周公北面立戴璧秉圭

璧以禮神圭以為贊

告於太

王王季

告謂祝辭

史策祝

史為策祝詞也又曰策周公所作謂簡書也

祝者讀此簡書以告三

王

曰惟爾元孫王發勤勞阻疾

阻一作淹

若爾三王是有丕

子之責於天以旦代王發之身

丕子之責謂疾不可救也

旦代之死生有命不可請代聖人叙臣子之心以垂世教

旦巧能多材多藝能事鬼

神

言可以代武王之意

乃王發不如旦多技多藝不能事鬼神乃命

予帝庭敷佑四方

武王受命於天帝之庭布其道以佑助四方

用能定汝子

孫于下地四方之民罔不敬畏

言武王用受命帝庭之故故能定先人子孫于

天下四方之民無不敬畏也

無墜天之降保命我先王亦永有依歸

言不

救則墜寶命保救之則先王上有依歸矣降
墜也寶猶主也有所依歸為宗廟之主也今我其即

命於元龜

就受三王之命於元龜大卜知吉凶者也元龜大龜也

爾之許我我其

以璧與圭歸以俟爾命

許謂疾瘳待命當以事神也待汝命武王當愈我當死也

爾

不許我我乃屏璧與圭

不許不愈也屏藏言不得事神

周公已令史策

告太王王季文王欲代武王發於是乃即三王而卜

人皆曰吉發書視之信吉

卜兆書也

周公喜開籥乃見書遇

吉

籥藏占兆書管也

周公入賀武王曰王其無害旦新受命三

王維長終是圖

我新受三王命武王維長終是謀周之道

茲道能念予一人

一人天子也茲比也

周公藏其策金縢匱中

藏之于匱緘之以誠金不欲人開也

守者勿敢言明日武王有瘳周公卒後秋未獲暴風雷

雨未盡偃大木將拔周國大恐成王與大夫朝服以開

金縢書王乃得周公所自以為功代武王之說

一作簡所藏請

命策書本也

二公及王乃問史百執事

二公及王啓之故先見書也史百執事皆

從周公請命者問審然否也

史百執事曰信有昔周公命我勿敢言

成王執書以泣

泣者傷周公忠孝誠如是而無知之者

曰自今後其無繆

卜乎

本欲敬卜吉凶今天意可知故止

周公勤勞王家惟予幼人弗及

知今天動威以彰周公之德惟朕小子其親迎我國家禮

亦宜之

亦宜褒有德也

王出郊天乃雨反風禾盡起

郊以玉幣謝天也天

即反風起未明郊之是也反風風還反也二公命國人凡大木所偃盡起而

築之

築拾也禾為木所偃者起其木拾其下木乃無所失

歲則大熟初成王幼不

能涖詐

涖視也人行不能視詐

周公相踐詐而治

踐履也代成王履詐

階攝王位治天下也

抗世子法於伯禽欲令成王之知父子君臣

長幼之道也

抗猶舉也謂舉為子之法使與成王居以學之

成王有過則撻伯

禽所以示成王世子之道也

以成王之過擊伯禽則是以感喻焉

周公還

政成王北面就臣位躬躬

躬躬敬謹貌

如畏然成王少疾病

周公乃自揃其蚤沈之河以祝於神曰王少未有識奸

神命者乃旦也亦藏其策於府成王病有瘳及成王用

事人或譖周公周公奔楚成王發府見周公禱書乃泣

反周公

周公攝政遠則四國流言近則王不知周大夫美其不失其聖故作狼跋之詩

召公虎為王卿士時厲王出奔彘

彘晉地漢為縣河東今永安也

厲厲

王太子靜匿虎之家國人聞之乃圍之召公曰昔吾驟

諫王王不從以及此難也今殺王太子王其以我為讐

而懟怒乎夫事君者險而不讐懟

在危險之中

怨而不怒況

事王乎乃以其子代王太子太子竟得脫召周公二
相行政號曰共和共和十四年厲王死於彘太子靜長
於召公家二相乃共立之為王是為宣王二相輔之修
政法文武成康之遺風諸侯復宗周

漢蕭何徵時與曹參善及為宰相有隙

參自以戰功多而封賞每在何

後故怨何也

至何且死所推賢唯參參代何為相國舉無所

變更一遵何之約束

申屠嘉文帝時為丞相為人廉直門下不受私謁

霍光昭帝時為大司馬輔幼主政自已出

帝時八歲也
政事一決于

光

天下想聞其丰采其後蓋主燕王上官桀與子安謀

殺光廢帝光盡誅桀安等光威振海內帝既冠遂委任

光訖十三年百姓充實四夷賓服

魏相宣帝初為御史大夫四歲大將軍霍光薨上思其
功德以其子禹為右將軍兄子樂平侯山復領尚書事
相因平恩侯許伯奏封事言春秋譏世卿惡宋三世為

大夫及魯季孫之專權皆危亂國家自後元以來祿去
王室政繇冢宰今光死子復為大將軍兄子秉樞機昆
弟諸壻據權勢在兵官光夫人顯及諸女皆通籍長信
宮

通籍謂禁門之中皆有
名籍悉出入也

或夜詔門出入驕奢放縱恐寢

不制

寢漸也不制
不可制節也

宜有以損奪其權破散陰謀以固萬

世之基金功臣之世又故事諸上書者皆為二封署其
一曰副領尚書者先發副封所言不善屏去不奏相復
因許伯白去副封以防壅蔽帝善之詔相給事中皆從

其議霍氏殺許后之謀始得上聞

張安世宣帝時為大司馬領尚書事嘗有所薦其人來

謝安世大恨以為舉賢達能豈有私謝邪絕弗復為通

有欲謝者皆不之見一日告此人而絕之更不與相見也

張禹成帝時為丞相後以特進為太子師見時有變異

若上體不安擇日潔齋露著

露筮易著于星宿下明日乃用言得天氣也著草名

筮者所用也正衣冠立筮得吉卦則獻其吉如有不吉禹為

感動憂色

孔光安帝時為丞相帝躬行儉約省減諸用政事繇已
出朝廷翕然望至治焉褒賞大臣並封光千戶時成帝
母太皇太后自居長樂宮而帝祖母定陶傅太后在國
邸有詔問丞相大司空定陶共王太后宜當何居光素
聞傅太后為人剛暴長於權謀自帝在襁褓而養長教
道至於成人帝之立又有力光心恐傅太后與政事不欲
令與帝旦夕相近即議以為定陶太后宜改築宮大司
空何武曰可居北宮帝從武言北宮有紫房複道通未

央宮傅太后果從複道朝夕至帝所欲稱尊號貴寵其親屬使帝不得直道行頃之太后從弟子傅遷在左右尤傾邪帝免官遣歸故郡傅太后怒帝不得已復留遷光與大司空師丹奏言詔書侍中駙馬都尉遷巧佞無義漏泄不忠國之賊也免歸故郡復有詔止天下疑惑無所取信虧損聖德誠不小愆陛下以變異連見避正殿見羣臣思求其故至今未有所改舊有不善之事皆未改除臣請歸遷故郡以銷姦黨應天戒卒不得遣復為侍中脅於

傳太后皆此類也又傳太后欲與成帝母俱稱尊號羣下

多順旨言母以子貴宜立尊號以厚孝道唯師丹與光

持不可

執持不可

帝重違大臣正議

重難也

又內迫傳太后倚

違者連歲

倚違猶依違耳

光凡為御史大夫丞相各再一為大

司徒太傅太師歷三世居公輔位前後十七年自為尚

書止不教授後為卿時會門下大夫講問疑難舉大義

云其弟子多成就為博士大夫者見師居大位幾得其

助力光終無所薦舉至或怨之其公如此

後漢第五倫章帝時為司空奉公盡節言事無所依違
諸子或時諫止輒叱遣之吏人奏記及便宜者亦并封
上其無私若此

袁安和帝時為司徒安以天子幼弱外戚擅權每朝會
進見及公卿言國家事未嘗不噫鳴流涕

魯恭安帝時再為司徒恭在公位選辟高第至侯郡守
者數十人而其耆舊大姓或不蒙薦舉至有怨望者恭
聞之曰學之不講是吾憂也諸生不有鄉舉者乎終無

所言

言人患學之不習耳若能習自有鄉里之舉豈待要三公之辟乎

李郃安帝時為司空數陳得失有忠臣節會北鄉侯立郃復為司徒及北鄉侯病郃陰與少府河南陶範步兵校尉趙直謀立順帝會孫程等事先成故郃功不顯

李固冲帝時為太尉梁太后臨朝固以清河王蒜年長有德欲立之謂冀曰今當立帝宜擇長年高明有德任親政事者願將軍詳審大計察周霍之立文宣戒鄧閭之利幼弱冀不從乃立樂安王子縉年八歲是為質帝

劉矩桓帝時為司空以蠻夷叛免靈帝初復為太尉矩再為上公所辟召皆名儒宿德不與州郡交通順辭默諫多見省用

陳蕃永昌元年為太傅錄尚書事時新遭大喪國嗣未立諸尚書畏懼權官託病不朝蕃以書責之曰古人立節事亡如存今帝祚未立政事日蹙諸君奈何委荼蓼之苦息偃在牀於義不足焉得仁乎諸尚書惶怖皆起視事靈帝初即位竇后臨朝蕃與后父大將軍竇武同

心盡力徵用名賢共參政事天下之士莫不延頸想望
太平

李咸為太尉靈帝熹平元年中常侍曹節王甫欲別冀
竇太后而以馮貴人配祔詔公卿大會朝堂令中常侍
趙忠監議咸時病乃扶輿而起擣椒自隨謂妻子曰若
皇太后不得配食桓帝吾不生還矣既議坐者數百人
各瞻望中官良久莫肯先言趙忠曰議當時定怪公卿
以下各相顧望司隸校尉陳球曰皇太后以盛德良家

母臨天下宜配先帝是無所疑忠笑而言曰陳廷尉宜
便操筆球即下議曰皇太后自在椒房有聰明母儀之
德遭時不造援立聖明承繼宗廟功烈至重先帝宴駕
因遇大獄遷居空宮不幸早世家雖獲罪事非太后今
若別葬誠失天下之望且馮貴人家墓被發骸骨暴露
與賊并尸魂靈汙染且無功於國何宜上配至尊忠省
球議作色俛仰唯球曰陳廷尉建此議甚健球曰陳竇
既冤皇太后無故幽閉臣常痛心天下憤歎今日言之

退而受罪宿昔之願公卿以下皆從球議咸始不敢先
發見球辭正然後大言曰臣本謂爾誠與臣意合會者
皆為之愧曹節王甫復爭之於是咸乃詣闕上疏曰臣
伏惟章帝竇后虐害恭懷安恩閭后家犯惡逆而和帝
無異葬之議順朝無貶降之文至於衛后孝武皇帝身
所廢棄不可以為比今長樂太后尊號在身親常稱制
坤育天下且援立聖明光降皇祚太后以陛下為子陛
下豈得不以太后為母子無黜母臣無貶君宜合葬宣

陵一如舊制帝省奏謂曹節等曰竇后雖為不道而太后有德於朕不宜降黜節等無復言於是議者乃定咸在朝清忠權幸憚之

荀爽獻帝初為司空因從遷都長安爽見董卓忍暴滋甚必危社稷其所辟舉皆取才畧之士將共圖之亦與司徒王允及卓長史何顥等為內謀會病薨

王允初平元年為司徒及董卓遷都關中卓尚留雒陽朝政大小悉委之於允允矯情屈意每相承附卓亦推

心不生乖疑故得扶持王室於危亂之中臣主內外莫不倚恃焉允見卓禍毒方深篡逆已兆密與司隸校尉黃琬尚書鄭公業等謀共誅之乃以護羌校尉楊瓚行左將軍事執金吾士孫瑞為南陽太守並將兵出武關道以討袁術為名實欲分路征卓而後拔天子還雒陽卓疑而留之允乃引內瑞為僕射瓚為尚書二年卓還長安三年春連雨六十餘日允與士孫瑞楊瓚登臺請霽復結前謀瑞曰自歲末以來太陽不炤霖雨積時月犯

執法彗孛仍見晝陰夜陽霧氣交侵此期應促盡內發者勝幾不可後公其圖之允然其言乃潛結卓將呂布使為內應會卓入賀呂布因刺殺之及李傕郭汜為亂攻長安城陷呂布奔走布駐馬青鎖門外招允曰公可以去乎允曰若蒙社稷之靈上安國家吾之願也如其不獲則奉身以死之朝廷幼少恃我而已臨難苟免吾不忍也努力謝關東諸公勤以國家為念傕乃收允殺之及宗族十餘人皆見誅害唯兄子晨陵得脫歸鄉里

天子感慟百司喪氣後遷都於許獻帝思允忠節使改殯葬之

趙溫為司徒時李傕與郭汜不協傕欲移獻帝溫與傕書曰公前託為董公報讐然實屠陷王城殺戮大臣天下不可家見而戶釋也今爭睚眦之隙以成千鈞之讐民在塗炭各不聊生曾不改悟遂成禍亂朝廷仍下明詔欲令和解詔命不行恩澤虧損而復欲移轉乘輿更幸非所此誠老夫所不解也於易一過為過再為涉三而

弗改滅其項凶不如早共和解引兵還屯上安萬乘下
全生民豈不幸甚惟大怒欲遣人害溫其從弟應故溫
掾也諫之數日乃止

楊彪為太尉錄尚書事及李傕郭汜之亂彪盡節為主
岢嶇危難之間幾不免於害彪見漢祚將終自以累世
為三公恥為魏臣遂稱足孿不復行積十餘年魏文帝
即王位欲以為太尉令近臣宣旨彪辭曰嘗仕漢朝為
三公值世衰亂不能立尺寸之益若復為魏臣於國之

選亦不為榮也帝不奪其意

蜀諸葛亮為丞相章武三年先主病篤召亮屬以後事
亮泣曰臣敢竭股肱之力効忠貞之節繼之以死建興
元年魏司徒華歆司空王朗尚書令陳羣太史令許芝
謁者僕射諸葛璋各有書與亮陳天命人事欲使舉國
稱藩亮遂不報書作正議曰昔在項羽起不繇德雖處
華夏東帝者之勢卒就湯鑊為後來戒魏不審鑒今次
之矣免身為幸戒在子孫而二三子各以耆艾之齒承

偽指而進書有若崇竦稱莽之功亦將偪於元禍苟免者邪昔世祖之創迹舊基奮羸卒數千摧莽彊旅四千餘萬於昆陽之郊夫據道討淫不在衆寡及至孟德以其譎勝之力舉數十萬之師救張郃於陽平勢窮慮悔僅能自脫辱其鋒銳之衆遂喪漢中之地深知神器不可妄獲旋還未至感毒而死子桓淫逸繼之以篡縱使二三子多逞蘇張詭靡之說奉進驩兜滔天之辭欲以誣毀唐帝諷解禹稷所謂徒喪文藻煩勞翰墨者矣夫

大人君子之所不為也又軍誠曰萬人必死橫行天下
昔軒轅氏整卒數萬制四方定海內況以數十萬之衆
據正道而臨有罪可得干擬者哉五年亮率諸軍北駐
漢中臨發上疏曰先帝創業未半而中道崩殂今天下三
分益州疲弊此誠危急存亡之秋也然侍衛之臣不解
於內忠志之士忘身于外者蓋追先帝之殊遇欲報之
於陛下也誠宜開張聖聽以光先帝遺德恢弘志士之
氣不宜妄自菲薄引喻失義以塞忠諫之路也宮中府

中俱為一體陟罰臧否不宜異同若有作姦犯科及為
忠善者宜付有司論其刑賞以昭陛下平明之理不宜
偏私使內外異法也侍中侍郎郭攸之費禕董允等此
皆良實志慮忠純是以先帝簡拔以遺陛下愚以為宮
中之事事無大小悉以咨之然後施行必能裨補闕漏
有所廣益將軍向寵性行淑均曉暢軍事試用於昔日
先帝稱之曰能是以眾議舉寵為督愚以為營中之事
悉以咨之必能使行陣和睦優劣得所親賢臣遠小人

此先漢所以興隆也親小人遠賢臣此後漢所以傾頽也先帝在時每與臣論此事未嘗不歎息痛恨於桓靈也侍中尚書長史參軍此悉貞良死節之臣願陛下親之信之則漢室之隆可計日而待也臣本布衣躬耕南陽苟全性命於亂世不求聞達於諸侯先帝不以臣卑鄙猥自枉屈三顧臣於草廬之中諮臣以當世之事繇是感激遂許先帝以驅馳後值傾覆受任於敗軍之際奉命於危難之間爾來二十有一年矣

按劉備以建安十三年遣亮使

吳亮以建興五年抗表北伐自傾覆至此整二十年然備始與亮相遇在敗軍之前一年時也

臣謹慎故臨崩寄臣以大事也受命以來夙夜憂歎恐

託付不效以傷先帝之明故五月渡瀘深入不毛

漢書地里

志曰瀘津水出牂牁郡句町縣

今南方已定甲兵已足當獎率三軍北

定中原庶竭駑鈍攘除奸凶興復漢室還於舊都此臣

所以報先帝而忠陛下之職分也至於斟酌損益進盡

忠言則攸之禕允之任也願陛下託臣以討賊興復之

效不效則治臣之罪以告先帝之靈若無忠益之言責

攸之禕允等之慢以彰其咎陛下亦宜自謀以諮諏善
道察納雅言深追先帝遺詔臣不勝受恩感激今當遠
離臨表涕零不知所言亮與法正雖好尚不同以公義
相取亮每竒正智術亮出駐漢中張裔以射聲校尉領
留府長史嘗稱曰公賞不遺遠罰不阿近爵不可以無
功取刑不可以貴勢免賢愚之所以僉忘其身者也李
嚴嘗有書與亮勸亮宜受九錫進爵稱王亮答書曰吾
與足下相知久矣可不復相解足下方誨以光國戒之

以勿拘之道是以未得默已吾本東方下士誤知於先帝位極人臣祿賜百億今討賊未效知已未答而方寵齊晉坐自貴大非其義也若滅魏斬敵帝還故居與諸子並升雖十命可受況於九邪亮與兄瑾書曰喬本當還成都喬亮子也令諸將子弟皆得轉運思惟宜同榮辱今使喬督五六百兵與諸子弟傳於谷中

吳顧雍為丞相時訪建民間及政職所宜輒密以聞若見納用則歸之於上不用終不宣泄然於公朝有所陳

及辭色雖順而所執者正大帝嘗令中書郎詣雍有所
咨訪若合雍意事可施行即與相反覆究而論之為設
酒食如不合意雍即正色改容默然不言無所施設郎
還告權曰顧公歡悅是事合宜也其不言是事未平也
孤當重思之

晉安平王孚初為魏太傅高貴鄉公遇害百官莫敢奔
赴孚枕尸於股哭之慟曰殺陛下者臣之罪奏推主者
會太后令以庶人禮葬孚與羣公上表乞以王禮葬從

之孚性至慎宣帝執政嘗自退損後逢廢立之際未嘗
預謀景文二帝以孚屬尊亦不敢逼後進封長樂公及
武帝受禪陳留王就金墉城孚拜辭執王手流涕歔歔
不能自勝曰臣死之日固大魏之純臣也

衛瓘為司空領太子少傅惠帝之為太子也朝臣咸謂
純質不能親政事每欲瓘陳啟廢之而未敢發後會宴
凌雲臺瓘托醉因跪帝牀前曰臣欲有所啟帝曰公所言
何邪瓘欲言而止者三因而以手撫牀曰此座可惜帝

意乃悟因謬言曰公真大醉邪瓘於此不復有言

張華惠帝時為司空賈后謀廢太子左衛率劉卞甚為太子所信遇每會宴卞必預焉屢見賈謚驕傲太子恨之形於言色謚亦不能平卞以賈后謀問華華曰不聞卞曰卞以寒族自須昌小吏受公成拔以至今日士感知已是以盡言而公更有疑於卞耶華曰假令有此君欲如何卞曰東宮俊乂如林四率精兵萬人公居阿衡之任若得公命皇太子因朝入錄尚書事廢賈后於金

墉城兩黃門力耳華曰今天子當陽太子人子也吾又不受阿衡之命忽相與行此是無其君父而以不孝示天下也雖能有成猶不免罪況權威滿朝威柄不一而可以安乎及帝會羣臣於式乾殿出太子手書徧示羣臣莫敢有言者唯華諫曰此國之大禍自漢武以來每廢黜正嫡常至喪亂且國家有天下日淺願陛下詳之尚書左僕射裴頤以為宜先檢校傳書者又請比較太子手書不然恐有詐妄賈后乃內出太子手書事十餘

使衆人比視亦無敢言非者議至日西不決后知華等
意堅因表乞免為庶人帝乃可其奏初趙王倫為鎮西
將軍撓亂關中氐羌反叛乃以梁王彤代之或說華曰
趙王貪昧信用孫秀變詐姦雄今可遣梁王斬秀刈趙
之半以謝關右不亦可乎華從之彤許諾秀友人辛冉
從西來言於彤曰氐羌自反非秀之為故得免死倫既
還謫事賈氏因求錄尚書事後又求尚書令華與裴頠
皆固執不可繇是致怨倫秀疾華如讐華少子驤以中

台星圻勸華遜位華不從曰天道玄遠惟修德以應耳
不如靜以待之以俟天命及倫秀將廢賈后秀使司馬
雅夜告華曰今社稷將危趙王欲與公共扶朝廷為霸
者之事華知秀等必成篡奪乃拒之雅怒曰及將加頸
而吐言如此不顧而出華方晝卧忽夢見屋壞覺而惡
之是夜難作詐稱詔召華遂與裴顧俱被收華將死謂
張林曰卿欲作忠臣邪林稱詔詰之曰卿為宰相任天
下事太子之廢不能死節何也華曰式乾之議臣諫事

具陳非不諫也林曰諫若不從何不去位華不能答須臾使者至曰詔斬公華曰臣先帝老臣中心如丹臣不愛死懼王室之難禍不可測也遂害之於前殿焉遂夷三族朝野莫不悲痛之時年六十九

王渾惠帝時為司徒時楚王瑋將害汝南王亮等公孫宏說瑋曰昔宣帝廢曹爽引太尉蔣濟參乘以增威重大王今舉非常事宜得宿望鎮厭衆心司徒王渾宿有威名為三軍所信服可請同乘使物情有憑也瑋從之

渾辭疾歸第以家兵千餘人閉門拒瑋瑋不敢逼俄而瑋以矯詔伏誅渾乃率兵赴宮

傳祇懷帝時為司徒大將軍苟晞表請遷都使祇出詣河陰修理舟楫為水行之備及雒陽陷沒遂共建行臺推祇為盟主以司徒持節大都督諸軍事傳檄四方子宣先尚弘農公主乃遣宣將公主與尚書令和郁赴告方伯徵義兵祇自屯盟津小城宣弟暢行河陰令以待宣祇以暴疾薨時年六十九祇自以義誠不終力疾

手筆勅勵其二子宣暢辭旨深切覽者莫不感激慷慨
王導元帝時為侍中司空假節錄尚書領中書監王敦
之反也劉隗勸帝悉誅王氏論者為之危心導率羣從
昆弟子姪二十餘人每旦詣臺待罪帝以導忠節有素
特還朝服召見之及敦得志加導守尚書令初西都覆
沒海內思主羣臣及四方並勸進於帝時王氏彊盛有
專天下之心敦憚帝賢明欲更議所立導固爭乃止及
此役也敦謂導曰不從吾言幾致覆族導猶執正議敦

無以能奪又自漢魏以來羣臣不拜山陵導以元帝暭
同布衣匪惟君臣而已每一崇進皆就拜不勝哀感繇
是詔百官拜陵自導始也

陸暭成帝時為左光祿大夫開府儀同三司蘇峻之難
暭隨帝在石頭舉動方正不以凶威變節峻以暭吳士
之望不敢加害使守留臺會匡術以苑城歸順時共推
暭督宮城軍事

何充廢帝時為侍中錄尚書事以衛將軍褚裒皇太后

父宜綜朝政上疏薦裒參錄尚書裒以地逼固求外出
充每曰桓溫褚裒為方伯殷浩居門下我可無勞矣充
居宰相雖無澄正改革之能而彊力有器局臨朝正色
以社稷為己任凡所選用皆以功臣為先不以私恩樹
親戚談者以此重之

王坦之與謝安共輔幼主為中書令臨終與謝安桓冲
書言不及私惟憂國家之事朝野甚痛惜之

宋袁粲為尚書令與褚淵等受顧命元徽元年丁母憂

冀竟攝令親職加衛將軍不受二年桂陽王休範為逆
繫扶曳入殿詔加兵自隨府置佐史時兵難危急賊已
至南掖門諸將意沮咸莫能奮繫慷慨謂諸將帥曰寇
賊已逼而衆情離沮孤子受先帝顧託本以死報今日
當與諸護軍同死社稷因命左右被馬辭色哀壯於是
陳顯達等感激出戰賊即平殄

後魏長孫嵩太帝末為司徒明元帝寢疾問後事於嵩
嵩曰立長則順以德則人服今長皇子賢而世嫡則天

所命也請立之乃定策詔太武臨朝監國嵩為左輔
陸麗文成時受心膂之任封平原王為司徒公和平六
年文成厭世麗療疾於代郡溫泉聞諱欲赴左右止之
曰王德望素重姦臣若疾民譽慮有不測之禍願少遲
迴朝廷寧靜然後奔赴猶為未晚麗曰安有聞君父之
喪方慮禍難不即奔波者遂便馳赴

後周竇熾為太傅武帝於太德殿將謀伐齊熾時年已
衰老乃扼腕曰臣雖朽邁請執干櫓首啓戎行得一覩

誅翦鯨鯢廓清寰宇省方觀俗登岳告成然後歸魂泉壤無復餘恨帝壯其志節遂以熾第二子武當公恭為左二軍總管

隋高頴為右僕射無納言進引貞良以天下為己任唐馬周為中書令臨終索陳事表草一一手自焚之慨然曰管晏彰君之過求身後之名吾弗為也

溫彥博太宗時為中書令自掌知機務即杜絕賓客國之利害知無不言太宗以是嘉之

褚遂良高宗永徽中為尚書右僕射知政事高宗欲立武后遂良將以死爭之或曰長孫太尉當先言之遂良曰太尉上之元舅脫事有不如意使上有怒舅之名不可曰英公勳上之所重當先言之遂良曰司空國之元勳有不如意使上有罪功臣之名不可遂良起自草茅無汗馬功蒙先帝殊遇以至今日且躬奉遺詔若不盡其愚誠何以下見先帝遂謀極言忤旨出為潭州都督劉禕之則天朝為鳳閣鸞臺三品禕之謂鳳閣舍人賈

大隱曰太后既能廢昏立明何用臨朝不如返政以安天下之心大隱密奏其言則天不悅謂左右曰禕之我所引用乃有背我之心豈復顧我恩也

狄仁傑同鳳閣鸞臺平章事時中宗自房陵還宮則天匿之帳中召仁傑以廬陵為言仁傑慷慨敷奏言發涕流遽出中宗謂仁傑曰還卿儲君仁傑降階泣賀既已奏曰太子還宮人無知者物議安審是非則天以為然乃復置中宗於龍門具禮迎歸

姚元之則天聖歷初為夏官侍郎同平章事則天謂侍
臣曰往者周興來俊臣等推勘制獄朝臣遞相牽引咸
承反逆國家有法朕豈能違中間宜有枉濫更使近臣
就獄親問皆得手狀承引不虛朕以為然即可其奏近
日周興俊臣死後無聞有反逆者然則已前就戮者不
有冤濫邪元之對曰自垂拱已來被告身死破家者皆
是毒酷自誣而死告者特以為功天下號為羅織甚於
漢之黨錮陛下令近臣就獄問者近臣亦自不保何敢

輒有動搖被問者若翻又懼遭其毒手將軍張虔勗李
安靜等皆是也賴上天降監聖情發明誅鋤克豎朝廷
乂安今日以微軀及一門百口保見在內外官更無反
逆者乞陛下得告狀但収掌不須推問若後驗反逆有
實臣請受知而不告之罪則天大悅曰以前宰相皆順
成其事陷朕為淫刑之主聞卿所說甚合朕心後則天
移居上陽宮中宗率百官就宮起居王公已下皆欣躍
稱慶元之獨嗚咽流涕彥範東之謂元之曰今日豈是

啼泣時邪恐公禍從此始元之曰事則天年久乍此辭
違情發於中非忍所得為昨從公誅凶逆者是臣之常
道豈敢出言今辭違舊主悲泣者亦臣子忠節緣此獲
罪實所甘心無幾出為亳州刺史至睿宗朝元之為中
書令玄宗在東宮太平公主干涉朝政宋王成器為閑
廐使岐王範薛王業皆掌禁兵外議以為不便元之與
侍中宋璟密奏請令公主往就東都出成器等諸王為
刺史以安人心

崔玄暉為鸞臺侍郎知政事則天不豫宰相不得召見者累日及疾少間玄暉奏言皇太子相王仁明孝友足可親侍湯藥宮禁事重伏願不令異姓出入則天曰深領卿厚意尋以預誅張易之功擢拜中書令封博陵郡公

蕭至忠中宗景龍中為中書令時宗楚客紀處訥潛懷姦計自樹朋黨韋巨源楊再思李嶠皆唯諾自全無所拯救至忠處其間獨存正道時議翕然重之中宗亦曰

諸宰相中至忠最憐我

蘇瓌為尚書右僕射同中書門下三品神龍末韋庶人
秘不發中宗喪召諸宰相韋巨源蕭至忠宗楚客紀處
納韋溫李嶠韋嗣立唐休璟趙彥昭及瓌入禁中會議
初草遺制遣韋庶人知政事輔少主授安國相王太尉
參謀輔政宗楚客韋溫曰今既通請皇太后臨朝宜停
相王輔政且太后於相王居嫂叔不通問之地甚難為
儀注理全不可瓌獨正色拒之謂楚客等曰既稱遺制

安可輒改邪楚客及溫大忿固執迺行其月相王即尊位下制曰尚書右僕射同中書門下三品監修國史許國公蘇瓌自周旋近密損益樞機謀猷有成翊贊無怠頃者仰惟先帝顧托注意昭明姦回動搖內外危懼獨申讜議實挫邪謀况藩邸僚屬念殷惟舊無德不報宜准令典司尚書左僕射餘如故

劉幽求先天元年為尚書右僕射同中書門下三品時崔湜託附太平公主將謀逆亂幽求乃與右羽林將軍

張暉請以羽林兵誅之仍令暉密奏東宮曰宰相中有
崔湜岑義俱是太平公主進用見作方計其事不輕殿
下若不早誅必成大患一朝事出意外太上皇何以得
安古人云當斷不斷必受其亂唯請急殺此賊劉幽求
已共臣作定計訖願以身正此事赴死如歸臣既職典
禁兵若奉陛下命便當除剪玄宗深以為然暉洩其謀
於侍御史鄧光賓太子大懼遽列上其狀睿宗下幽求
等詔獄令法官奏幽求等以疎間親罪死玄宗屢救獲

免乃流幽求于封州暉于絳州歲餘太平公主等伏誅
其日制以幽求為左僕射知軍國事

宋璟睿宗朝為吏部尚書同中書門下三品時玄宗在
春宮太平公主謀不利於玄宗嘗於光範門內乘輦伺
執政以諷之衆皆失色璟昌言曰東宮有大功於天下
真宗廟社稷之主安得有異議遂與姚元之同奏請令
公主就東都以絕其謀玄宗懼抗表加罪於璟等乃貶
璟為楚州刺史及玄宗即位以璟為侍中開元四年秋

駕幸東都次永寧之峭谷馳道隘狹車騎停擁帝怒河南尹李朝隱及知頓使王怡將罪之璟入奏曰陛下富有春秋方事巡狩暫以窄隘致罪二臣竊恐將來人受其弊帝遽令捨之璟拜謝曰陛下責之以臣言而免之是過歸於上而恩繇於下請且使待罪於朝然後詔復其職則進退得其度矣玄宗深善之十二年車駕東巡璟為留守帝臨發謂璟曰卿國之元老為朕之股肱耳目今將巡雒邑為別歷時所有嘉猷宜相告也璟因極

言得失特賜綵繒等物仍降手制曰所進之言書之座右出入觀省以誠終身其見重如此

源乾曜開元中為侍中上疏曰臣竊見勢要之家併求京職俊乂之士多任外官王道平分不合如此臣三男俱是京任望出二人與外官以叶均平之道帝從之於是改其子河南府參軍弼為絳州司功大祝潔為鄭縣尉因下制曰源弼等父在樞近深惟謙挹思代官之咸列慮時才之未序率先庶僚崇是讓德傳不云乎范宣

子讓其下皆讓晉國之人於是大和道之或行仁豈云
遠因令文武百僚父子兄弟三人併任京司者任通融
各依資處分繇是公卿子弟京官出外者百餘人

韋見素為門下侍郎平章事天寶十五年玄宗幸蜀郡
見素與楊國忠脫身扈從國忠素無學術不知禮體臨
難恐懼迫乘輿出城道路畧無儲備玄宗至咸陽望賢
宮榛蕪蔽路官吏四散從官咸怨國忠及次武功之馬
嵬驛右龍武軍將軍陳玄禮素以忠正稱乃奏國忠不

臣誅之見素為亂兵傷額玄宗命左右傳呼曰莫傷韋見素仍遣親王以藥傅之遂獲全見素晨夜匪懈忠節逾厲玄宗益親重之

苗晉卿為侍中代宗即位晉卿年已衰暮廣德初吐蕃寇長安晉卿時病卧私第蕃賊聞之輿入逼脅晉卿閉口不言賊不敢害及帝自陝冊為太保罷知政事

崔祐甫建中初為相薦延推舉無復凝滯日除數十人作相未逾年凡除吏幾八百員多稱允當帝嘗謂曰有

人謗卿所除擬官皆涉親故何也祐甫奏曰臣頻奉聖旨今所有進擬庶官必須諳其才行者臣若與相識方可粗諳若平生未曾相見即無繇知其言行獲謗之繇實在於此帝亦以為然

齊映貞元中為相時吐蕃數入寇人心動搖及上將行幸陝映曰夷狄亂華臣之罪也今人情凶懼謂陛下理裝具糗糧臣聞大福不再奈何不與臣等熟計之俯伏流涕帝亦為感慟

陸贄德宗貞元中為相嘗自以少年入翰林蒙幸天子天子長養成就之不敢自愛事之不可者皆力爭之曰吾上不負天子下不負吾所學不恤其佗

竇易直文宗朝在相位未嘗論用親黨凡於公舉即無所避

韋處厚為相太和元年四月宰相等於延英既出再召處厚獨對一刻餘時宰臣啓事得請之後往往中變是日處厚與裴度竇易直同對既而從容獨進曰陛下用

臣等為宰相使參大政前後論奏皆蒙聽納近日雖云
不阻然臣等既退尋多改易事若出自聖旨則是陛下
示臣等以不信若與別人商量則臣等不合更居此位
且裴度以元勲舊德歷相四朝孜孜竭誠人望所屬陛
下固宜親重易直以忠厚長者輔佐先帝陛下亦當委
付微臣是陛下首自選擢用非因人所言不從臣合先
退乃再拜陳乞帝瞿然曰卿何事邪朕知卿合作宰相
也昨內難既定朕以人望所屬用卿不疑軍國事多方

所倚賴令即辭免是彰朕之不德朝廷四方其謂朕何
慰勉久之而退既出延英門遽命中人復召處厚獨入
諮訪移時畧開陳理體者數百言其要以旌別淑慝修
舉法制為請因復懇言裴度勲大望崇且其心忠蓋可
以久於任使帝欣納焉

裴度為司徒中書令及薨文宗怪度無遺表中使問之
家人進其藁草其旨以未定儲位為憂言不及於家事
魏謩宣宗時為戶部侍郎平章事謝日奏曰臣無稷契

之才驟叨社稷之任將何以仰報鴻私今邊戎粗安海
內寧息臣愚所切陛下未立東宮俾正人傳導以存副
貳之重因泣下帝感而聽之先是累朝人君不欲人言
立儲貳若非人主已欲臣下不敢獻言帝春秋高嫡嗣
未辨謩作相之日率先啟奏人士重之

梁敬翔為相及劉鄩失河朔安彥之喪楊劉翔奏曰國家
連年遣將出征封疆日削不獨兵驕將怯亦制置未得
其術陛下處深宮之中與之計事者皆左右近習豈能

量敵之勝負哉先皇帝時河朔半在親御虎臣驍將獨
不得志於敵人今寇馬已至鄆州陛下不留聖念臣所
未諭一也臣聞李亞子自墨縵統衆於今年每攻城
臨陣無不親當矢石昨聞攻楊劉率先負薪渡水一鼓
登城陛下儒雅守文未嘗如此俾賀瓌輩與之較力而
望攘逐寇戎臣所未諭二也陛下所宜詢於鰲老別運
沉謀不然則憂未艾也臣雖駑怯受國恩深陛下必苦
乏材乞於邊陲效試未帝雖知具懇惻竟以趙張輩言

翔怨望不之聽及王彥章敗於中都晉人長驅而南未
帝急召翔謂之曰朕居常忽卿所奏果至今日事急矣
勿以為懟且指朕安歸翔泣奏曰臣受國恩已及三紀
從微至著皆先朝所遇雖名宰相實朱氏老奴耳事陛
下如郎君以臣愚誠敢有所隱陛下初任段凝為將臣
已極言小人朋附致有今日晉軍即至段凝限水欲請
陛下移居避敵陛下必不聽從欲請陛下出奇應敵陛下
必不果決縱良平復生難以轉禍為福請先死不忍見

宗廟隕墜言訖君臣相向慟哭及晉主陷都城有詔赦
梁氏臣僚李振謂翔曰有制洗滌將朝新君翔曰新君
若問具將何辭以對是夜翔在高頭里第宿於車坊欲
曙左右報曰崇政李太保已入廟翔返室歎曰李振謬
為丈夫耳朱氏與晉仇讐我等始同謀畫致君無狀令
少主伏劍於國門縱新朝赦罪何面目入建國門邪乃
自經而卒

冊府元龜卷三百十五

欽定四庫全書

冊府元龜卷三百十六 宋 王欽若等 撰

宰輔部

正直

詩曰有覺德行四國順之周書曰爾身克正罔敢不正
斯正直之謂也蓋有為天子之宰居馭假之任庶民具
瞻羣司承式而能勵骨鯁之操茂羔羊之德臨大節而
不奪履中道而無二危言抗論進無徒從守法持正事

無過舉靡徇人主之欲而求容悅罔阿貴近之意以紊
憲度乃至指佞邪於公朝拒請托於私室孤立特行無
所畏憚積毀羣吠莫之動撓廷議表介石之節板蕩彰
勁草之志流風嘉話溢于前聞斯固神明之介福後來
之聳慕者已

周仲山甫佐宣王柔亦不茹剛亦不吐不畏強禦

漢周昌高帝時為御史大夫嘗燕入奏事

以帝宴時入奏事燕謂安

閑之帝方擁戚姬

擁抱也

昌還走

還謂却退

帝遂得騎昌項問

曰我何如主也昌仰曰陛下即桀紂之主也於是帝笑之然尤憚昌及帝欲廢太子而立戚姬子如意為太子大臣固爭莫得帝以留侯策即止而昌廷爭之強帝問其說昌為人吃又盛怒曰臣口不能言然臣期期知其不可陛下欲廢太子臣期期不奉詔

以口吃故每重言期期

帝欣

然笑即罷吕后側耳于東廂聽

正寢東西室皆曰廂言其似箱篋之形見

昌為跪謝曰微君太子幾廢

微無也

王陵惠帝末為左丞相高后欲立諸吕為王問陵陵曰

高皇帝刑白馬而盟曰非劉氏而王者天下共擊之今
王呂氏非約也太后不悅問左丞相平及絳侯周勃等
皆曰高帝定天下王子弟今太后稱制欲王昆弟諸呂
無所不可太后喜罷朝陵讓平勃曰始與高帝啖血盟
諸君不在邪啖小飲也今太后女主欲王呂氏諸君縱欲阿
意背約何面目見高帝於地下乎曰今面折廷爭臣不
如君廷爭謂當朝廷而諫爭全社稷定劉氏後君亦不如臣陵無
以應之於是呂太后欲廢陵乃陽遷為帝太傅實奪之

相權陵怒謝病免杜門竟不朝請

杜塞也閉塞其門也請音才性反

申屠嘉文帝時為丞相大中大夫鄧通方愛幸賞賜累鉅萬帝嘗宴飲通家其見寵如是嘉入朝而通居帝旁

有怠慢之禮嘉奏事畢因言曰陛下幸愛羣臣則富貴

之至於朝廷之禮不可以不肅

肅敬也

帝曰君勿言吾私

之

言欲私戒教之

罷朝坐府中嘉為檄召通詣丞相府

檄木書也長二

尺不來且斬通通恐入言帝帝曰汝第往

第且也

吾今使

人召若

汝若亦汝也

通至詣丞相府免冠徒跣頓首謝嘉嘉坐

自如

如其故也

弗為禮責曰夫朝廷者高皇帝之朝廷也通

小臣戲殿上大不敬當斬吏今行斬之

嘉語其吏也今便行斬之

通

頓首首盡出血不解帝度丞相已困通使使持節召通而謝丞相曰此吾弄臣君釋之鄧通既至為帝泣曰丞相幾殺臣

周亞夫景帝時為丞相帝甚重之帝廢栗太子亞夫固爭之不得帝由此疎之而梁孝王每朝嘗與太后言亞夫之短竇太后曰皇后兄王信可侯也帝讓曰始南皮

及章武先帝不侯

南皮竇彭祖太后弟長君子章武太后母弟廣國

及臣即位

乃侯之信未得封也竇太后曰人生各以時行耳

言當貴當

及已竇長君在時竟不得侯死後乃其子彭祖顧得侯

及顧

也吾甚恨之帝趣侯信也帝曰請得與丞相計之亞夫

曰高帝約非劉氏不得王非有功不得侯不如約天下

共擊之今信雖皇后兄無功侯之非約也帝默然而沮

沮者止壞之意也

其後匈奴王徐盧等五人降漢

功臣表云

帝

欲侯之以勸後亞夫曰彼背其主降陛下陛下侯之即

何以責人臣不守節者乎帝曰丞相議不可用乃悉封徐盧等為列侯亞夫因謝病免相

卜式武帝元鼎中代石慶為御史大夫式既在位言郡國不便鹽鐵而船有筭可罷帝由是不悅式

霍光為大司馬大將軍昭帝時金日磾二子賞建俱侍中與昭帝畧同年及賞嗣侯佩兩綬帝謂光曰金氏兄弟兩人不可使俱兩綬耶光對曰賞自嗣父為侯耳帝笑曰侯不在我與將軍乎光曰先帝之約有功乃得侯

蕭望之為太子太傅宣帝寢疾以望之為前將軍與大
司馬車騎將軍史高光祿大夫周堪受遺詔輔政領尚
書事太子襲尊號是為元帝初宣帝不甚從儒術任用
法律而中書宦官用事中書令弘恭石顯久典樞機明
習文法亦與車騎將軍高為表裏論議嘗獨持故事不
從望之等恭顯又時傾仄見詘恭顯不能持正故議論
大事見詘于天子也
望之以為中書政本宜以賢明之選自武帝游宴後庭
故用宦者非國舊制又違古不近刑人義禮曰刑人不
在君側也

自欲更置士人由是大與高恭顯忤忤猶相違逆也元帝初即

位謙讓重改作重難也未欲更置士人于中書也議久不定

何武成帝時為大司空多所舉奏號為煩碎不稱賢公功名畧比薛宣其材不及也而經術正直過之

師丹為大司空哀帝卽位王太后詔令傳太后丁姬十日一至未央宮高昌侯董宏希指希望天子意指也上書言宜

立丁姬為帝太后丹劾奏宏懷邪誤朝不道帝初卽位

謙讓從丹言止

王嘉為丞相時侍中董賢愛幸於哀帝欲侯之帝心憚
嘉乃先使皇后父孔鄉侯傅宴持詔書視丞相御史於
是嘉與御史大夫賈延上封事諫帝感其言止數月遂

下詔封賢高安侯後日食嘉復奏封事言陛下初即位

共皇寢廟比比當作

共皇哀帝之父即定陶恭王也比比猶頻頻也共讀曰恭

憂閔

元元為用度不足

惟思也

以義割恩輒且止息今始作治

而董賢亦起官寺上林中又為賢治大第開門鄉

鄉讀作向

北闕引王渠灌園池

王渠官渠也又田在城東覆盎門外

使者護作賞賜

吏卒甚於治宗廟賢母病長安尉給祠具

長安有尉官主為官食

道中過者皆飲食

禱於道中故行人皆得飲食

為賢治器器成秦御

乃行或物好特賜其工自貢獻宗廟三宮猶不至此

三宮

天子太后皇后也

宜深覽前世以節賢寵于是帝寢不悅初廷

尉梁相與丞相長史御史中丞及二千石雜治東平王

雲獄時冬月未盡二旬而相心疑雲冤獄有飾詞

假飾之詞

非其實也

奏欲傳之長安

傳謂移其獄事

更下公卿覆治尚書令鞠

譚僕射宗伯鳳以為可許

宗伯姓也

天子以為相等韋雲踰

冬無討賊疾惡如仇之意制詔免相等皆為庶人後數日大赦嘉奏封事薦相等書奏上不能平後二十餘日嘉封還並董賢戶事帝乃發怒詔假謁者召嘉詣廷尉詔獄嘉下獄嘆曰幸得充備宰相不能進賢退不肖死有餘責吏問賢不肖主名嘉曰賢故丞相孔光故大司空何武不能進惡高安侯董賢父子佞邪亂朝而不能退罪當死死無所恨嘉不食嘔血而死後帝覽其對而思嘉言復以孔光代嘉為丞相徵用何武為御史大夫

後漢宋弘字仲子光武建武二年為大司空帝嘗問弘
通博之士弘乃薦沛國桓譚才學洽聞幾能及揚雄劉
向父子於是召譚拜議郎給事中帝每宴輒令鼓琴好
其繁聲弘聞之不悅悔於薦舉伺譚內出正朝服坐府
上遣吏召之譚至不與席而讓之曰吾所以薦子者欲
令輔國家以道德也而今數進鄭聲以亂雅頌非忠正
者也能自改邪將令相舉以法乎譚頓首辭謝良久乃
遣之後大會羣臣帝使譚鼓琴譚見弘失其常度帝怪

而問之弘乃離席免冠謝曰臣所薦桓譚者望能以忠
正導主而今朝廷耽悅鄭聲臣之罪也帝改容謝使反
服其後遂不復令譚給事中弘嘗燕見御坐新屏風圖
畫列女帝數顧視之弘正容言曰未見好德如好色者
帝即為撤之笑謂弘曰聞義則服可乎對曰陛下進德
臣不勝其喜

侯霸建武五年為大司徒在位明察守正奉公不回

趙熹為太尉中元末熹受遺詔典喪禮是時藩王皆在京

師自王莽篡亂舊典不存皇太子與東海王等雜止同席憲章無序憲乃正色橫劍殿階扶下諸王以明尊卑時藩國官屬出入宮省與百僚無別憲乃表奏謁者將護分止他縣諸王並令就邸唯朝晡入臨整禮儀嚴門衛內外肅然

袁安章帝章和元年為司徒及和帝即位竇憲北擊匈奴憲弟衛尉篤執金吾景各專威權公於京師使客遮道奪人財物景又擅使乘驛施檄緣邊諸郡發突騎及

善騎射有膂力者漁陽鴈門上谷三郡各遣吏將送詣第有司畏憚莫敢言者安乃劾景擅發邊兵驚惑吏人二千石不待符信而輒承景檄當伏顯誅又奏司隸校尉河南尹阿附貴戚無盡節之義

司隸鄭據河南尹蔡嵩

請免官

案罪並寢不報憲景等曰益橫盡樹其親黨賓客於名都

大郡

河南尹王調漢陽太守朱敞南陽太守滿殷皆賊高丹等皆賓客前書曰十二萬戶為大郡也

皆賦

斂吏人更相賂遺其餘州郡亦復望風從之安與任隗舉奏諸二千石又它所連及貶職免官者四十餘人賓

氏大恨但安隗素行高亦未有以害之

任隗為司空和帝即位大將軍竇憲秉權專作威福內
外朝臣莫不震懾時憲擊匈奴國用勞費隗奏議徵憲
還前後十上獨與司徒袁安同心畢力持重處正鯁言
直議無所回隱

鄭弘為太尉奏尚書張林阿附侍中竇憲而素行賊穢
又上雒陽令楊光憲之賓客在官貪殘並不宜處位書
奏吏與光故舊因以告之光報憲憲奏弘大臣漏泄密

事帝詰讓收上印綬弘自詣廷尉詔勅出之因乞骸
骨歸未許病篤上書陳謝并言竇憲之短帝省章遣醫
治弘病比至已卒臨沒悉還賜物勅妻子褐巾布衣素
棺殯殮以還鄉里

陳寵永元十六年為司空太尉張禹司徒徐防共奏追
封和熹皇后父護羌校尉鄧訓寵以先世無奏請故事
爭之連日不能奪乃從二府議及訓追加封謚禹防復
約寵俱遣子奉禮於虎賁中郎將鄧騭寵不從騭心不

平之

劉愷安帝時為司徒時征西校尉任尚以奸利被徵抵罪尚曾副大將軍鄧騭騭黨護之而太尉馬英司空李郃承望騭旨不復先請即獨解尚贓錮愷不肯與議後尚書案其事二府並受譴咎朝廷以此稱之

楊震延光二年代劉愷為太尉安帝舅大鴻臚耿寶薦中常侍李閏兄於震震不從寶乃自往候震曰李常侍國家所重欲令公辟其兄寶惟傳上意耳震曰如朝廷

欲令三府辟召故宜有尚書勅遂拒不許寶大恨而去
皇后兄執金吾閭顯亦薦所親厚於震震又不從

王龔為太尉深疾宦官專權志在匡正上書極言其狀
請加放斥諸黃門恐懼各使賓客誣奏龔罪順帝命亟自
實亟急也前掾李固奏記大將軍梁商即言之於帝事乃
得釋

楊秉為太尉桓帝南巡園陵時詔秉從南陽太守張彪
與帝微時有舊恩以車駕當至因傍發調多以入私秉

聞之下書責讓荊州刺史以狀副言公府

南陽郡荊州所部也

又

中常侍侯覽弟參為益州刺史累有贓罪虐一州秉劾

參檻車徵詣廷尉參惶恐道自殺

秉奏參取受罪贓累億牂柯男子張攸居

為富室參橫加非罪云造訛言殺攸家八人沒入廬宅又與同郡諸生李元之官共飲酒醉飽之後戲故相犯誣言有淫惡之罪應時捶殺以人臣之勢行祭紂之態傷和逆理痛感天地宜當紕持以謝一州又曰京兆尹袁逢於長安客舍中得參重車三百餘乘金銀珍玩不可勝記秉因奏覽及中常侍具

瑗曰臣按國舊典宦豎之官本在給使省闈司昏守夜

而今猥受過寵執政操權其阿諛取容者則因公褒舉

以報私惠有忤逆于心者必求事中傷肆其凶忿居法
王公富擬國家飲食極肴膳僕妾盈紈素雖季氏專魯
穰侯擅秦何以尚茲按中常侍侯覽弟參貪殘元惡自
取禍滅覽顧知釁重必有自疑之意臣愚以為不宜復
見親近昔懿公刑邠歆之父奪閭職之妻而使二人參
乘卒有竹中之難春秋書之以為至戒蓋鄭詹來而國
亂四佞放而衆服以此觀之容可近乎覽宜急屏斥
投畀豺虎若斯之人非恩所宥請免官送歸本郡書奏

尚書召對秉掾屬曰公府外職耳奏劾近官經典漢制有故事乎秉使對曰春秋趙鞅以晉陽之甲逐君側之惡傳曰除君之惡惟力是視鄧通懈慢申屠嘉召通詔責文帝從而請之漢世故事三公之職無所不統尚書不能詰帝不得已竟免覽官而削瑗國每朝廷有得失輒盡忠規諫多見納用

周景為司空時宦官任人及子弟充塞列位景初視事與太尉楊秉舉奏諸姦猾自將軍牧守以下免者五十

餘人遂連及中常侍防東陽侯侯覽東武陽侯具
瑗皆坐黜朝廷莫不稱之

杜喬為太尉桓帝將納梁冀妹冀欲令以厚禮迎之喬
據執舊典不聽又冀屬喬舉汜宮為尚書喬以宮臧罪
明著遂不肯用因此日忤於冀先是李固見廢內外喪
氣羣臣側足而立惟喬正色無所回撓繇是海內嘆息
朝野瞻望焉

黃瓊為司空桓帝欲褒崇大將軍梁冀使中朝二千石

以上會議其禮特進胡廣太常羊溥司隸校尉祝恬大
中大夫邊韶等咸稱冀之勲德其制度賚賞以宜比周
公錫之山川土田附庸瓊獨建議曰冀前以親迎之勞
增邑三千又其子胤亦加封賞昔周公輔相成王制禮
作樂化致太平是以大啓土宇開地七百令諸侯以戶
邑為制不以里數為限蕭何識高祖於泗水霍光定傾
危以興國皆益戶增封以顯其功冀可比鄧禹合食四
縣賞賜之差同於霍光使天下知賞必當功爵不越德

朝廷從之永興元年遷司徒轉太尉梁冀前後所托辟
召一無所用雖有善人而為冀所辟舉者亦不加命延
熹元年以日食免梁冀被誅瓊復拜太尉瓊首居公位
舉奏州郡素行貪污至死徙者十餘人海內咸翕然望
之尋而五侯擅權傾動內外自度力不能正乃稱疾不

起

五侯謂左
悺徐璜等

李固為太尉种暲為益州刺史時永昌太守冶鑄黃金
為文蛇以獻梁冀暲糾發逮捕馳傳上言而二府畏懦

不敢案之冀繇是銜之愈怒會巴郡人服直聚黨數百人自稱天王嵩與太守應承討捕不克吏人多被傷害冀因此陷之傳逮嵩承固上疏救曰臣伏聞討捕所傷本非嵩承之意實由縣吏懼法畏罪迫逐深苦致此不祥比盜賊羣起處處未絕嵩承以首舉大奸而相隨受罪臣恐沮傷州縣糾發之意更共飾匿莫復盡心梁太后省奏乃赦嵩承罪免官而已

陳蕃以桓帝延熹八年為太尉九年司隸校尉李膺遭

黨事考實曆案經三府蕃卻之曰今所考案皆海內人
舉憂國忠公之臣此等猶將十世宥也豈有罪名不章
而致收掠者乎不肯平署及竇太后臨朝蕃為太傅錄
尚書事蕃與后父大將軍竇武同心盡力共參政事而
帝乳母趙嬖旦夕在太后側中常侍曹節王甫等與共
交結諂事太后太后信之數出詔命有所封拜及其支
類多行貪虐蕃常疾之志誅中官會武亦有謀蕃自以
既從人望而德於太后必謂其志可申乃先上疏曰臣

聞言不直而行不正則為欺乎天而負乎人危言極意則羣凶反目禍不旋踵此二者臣寧得禍不敢欺天也今京師囂囂道路諠譁言侯覽曹節公乘昕王甫鄭璠等與趙夫人諸女尚書並亂天下附從者升進忤逆者中傷方今一朝羣臣如河中木耳泛泛東西耽祿畏害陛下前始攝位順天行誅蘇康管霸並伏其辜是時天地清明人鬼歡喜柰何數月復縱左右元惡大奸莫此之甚今不急誅必生變亂傾危社稷其禍難量願出臣

章宣示左右并令天下諸奸知臣疾之太后不納朝廷
聞者莫不震恐於是蕃武共定策誅中官會五月日食
蕃復說武曰昔蕭望之困一石顯近者李杜諸公禍及
妻子況今石顯數十輩乎蕃以八十之年欲為將軍除
害今可且因日食斥罷宦官以塞天變又趙夫人及女
尚書旦夕亂太后急宜退絕惟將軍慮焉武乃白太后
故事黃門常侍但當給事省內典門戶主近署財物耳
今乃使與政事而任權重子弟布列專為貪暴天下凶

句正以此故宜悉誅廢以清朝廷太后曰漢朝故事世有但當誅其有罪豈可盡廢耶時中常侍管霸頗有才畧專制省內武先白誅霸及中常侍蘇康等竟死武復數白誅曹節等太后猶豫未忍故事久不發至八月太白出西方劉瑜以書勸令速斷大計于是蕃以朱瑀為司隸校尉劉祐為河南尹虞祁為雒陽令武乃奏免黃門令魏彪以所親小黃門山永代之使永奏素狡猾尤無狀者長樂尚書鄭颺送北寺獄蕃謂武曰此曹子便

當收殺何復考為武不從令冰與尹勲侍御史祝瑒雜
考聽辭連及曹節等使劉瑜內奏時武出宿歸府典中
書者先以告長樂五官史朱瑀繇是曹節聞之矯詔誅武
蕃等

何進為大將軍與太傅袁隗輔政錄尚書事時靈帝中
平末何太后臨朝進素知中官天下所疾兼以蹇碩圖
已及秉朝政陰規誅之袁紹亦素有謀因進親客張津
勸之曰黃門常侍權重日久又與長樂太后專通奸利

將軍宜更清選賢良整齊天下為國家除患進然其言
又以袁氏累世寵貴海內所歸而紹素善養士能得豪
傑用其從弟虎賁中郎將術亦尚氣俠故並厚待之因
復博徵智謀之士龐紀何顯荀攸等與同心腹

袁滂靈帝時為司徒當權寵之盛或以同異致禍滂獨
中立於朝故愛憎不及焉

楊彪以靈帝中平六年為司徒明年關東兵起董卓懼
欲遷都以避其難乃大會公卿議曰高祖都關中十有

一世光武居雒陽於今亦十世矣案石包識宜徙都長
安以應天人之意百官無敢言者彪曰移都改制天下
大事故盤庚五遷殷民胥怨昔關中遭王莽變亂宮室
焚燒民庶塗炭百不一在光武受命更都雒邑今天下
無虞百姓樂安明公建立聖主光隆漢祚無故損宗廟
棄園陵恐百姓驚動必有糜沸之亂石包室識妖邪之
書豈可信用卓曰關中肥饒故秦得并吞六國且隴右
材木自出致之甚易又杜陵南山下有武帝故瓦陶竈

數千所并功營之可使一朝而辦百姓何足與議若有
前却我以大兵驅之可令諸滄海彪曰天下動之至易
安之甚難惟明公慮焉卓作色曰公欲沮國計邪太尉
黃琬曰此國之大事楊公之言得無可思卓不答司空
荀爽見卓意壯恐害彪等因從容言曰相國豈樂此耶
山東兵起非一日可禁故當遷以圖之此秦漢之勢也
卓意少解爽私謂彪曰諸君堅爭不止禍必有歸故吾
不為也議罷卓使司隸校尉宣播以災異奏免琬彪等

獻帝興平元年復為太尉及李傕郭汜之亂彪盡節衛
主崎嶇危難之間郭汜饗公卿議欲攻傕彪曰羣臣共
鬪一人劫天子一人執公卿此可行乎汜怒欲手刃之
中郎將楊密及左右多諫汜乃歸之建安四年復拜太
常魏文帝受禪欲以彪為太尉先遣使示旨彪辭曰彪
備位三公遭傾亂不能有所補益耄老被病豈可贊維
新之朝遂固辭

黃琬為太尉董卓議遷都長安琬與司徒楊彪同諫不

從琬退而駁議之曰昔周公營洛邑以寧姬光武卜東都
以隆漢天之所啟神之所安大業既定豈宜妄有遷動
以虧四海之望時人懼卓暴怒琬必及害固諫之琬對
曰昔白公作亂于楚屈廬冒刃而前崔杼弑君于齊晏
嬰不懼其盟吾雖不德誠慕古人之節琬竟坐免卓猶
敬其名德舊族不敢害

趙溫為司徒錄尚書事時李侏與郭汜相攻侏虜掠禁
省劫帝幸北塢外內隔絕侏素疑溫不與已同乃內溫

于塢中又欲移乘輿于黃白城溫與僉書曰公前托為
董公報仇然寔屠陷王城殺戮大臣天下不可家見而
戶說也今與郭汜爭睚眦之隙以成千鈞之仇人在塗
炭各不聊生曾不改悟遂成禍亂朝廷仍下明詔欲令
和解上命不行威澤日損而復欲移轉乘輿更幸非所
此誠老夫所不解也于易一為過再為涉三而弗改滅
其頂凶不如早共和解引軍還屯上安萬乘下全人民
豈不幸甚僉大怒欲遣人殺溫董卓從弟應溫故掾也

諫之數日乃獲免

魏董昭明帝太和中為司徒上疏陳末流之弊曰凡有天下者莫不貴尚敦樸忠信之士深疾虛偽不真之人者以其毀教亂治敗俗傷化也近魏諷則伏誅建安之末曹偉則斬戮黃初之始伏惟前後聖詔深疾浮偽欲以破散邪黨常用切齒而執法之吏皆畏其權勢莫能糾擿毀壞風俗侵欲滋甚切見當今年少不復以學問為本專更以交游為業國士不以孝弟清修為首乃以

趨勢游利為先合黨連羣互相褒嘆以毀訾為罰戮用
名譽為爵賞附已者則歎之盈言不附者則為作瑕釁
至乃相謂今世何憂不度邪但求人道不勤羅之不
博耳又何患其不知已矣但當吞之以藥而柔調耳又
聞或有使奴客名作在職家人冒之出入往來禁與交
通書疏有所探問凡此諸事皆法之所不取刑之所不
赦雖諷偉之罪無以加也帝于是發切詔斥免諸葛誕
鄧賜等

蔣濟齊王初為太尉是時曹爽專政丁謐鄧颺等輕改法度有日蝕變詔羣臣問其得失濟上疏曰昔大舜佐治戒在比周周公輔政慎于其朋齊侯問災晏嬰對以布惠魯君問異臧孫荅以緩役應天塞變乃實人事今二賊未滅將士暴露已數十年男女怨曠百姓貧乏夫為國法度惟命世大才乃能張其綱維以垂于後豈中下之吏所能改易哉終無益于治適足傷民望宜使文武之臣各守其職率以清平則和氣祥瑞可感而致也

又司馬宣王收曹爽兄弟皆誅之濟曰曹真之勲力不宜

絕祀帝不聽

臣欽若等曰曹真爽之父也

衛臻為司徒正始中進爵長垣侯初太祖久不立太子

而方奇貴臨菑侯

臣欽若等曰臨菑侯植也

丁儀等為之羽翼勸臻自

結臻以大義拒之及文帝即位東海王霖有寵帝問臻平原

侯何如

臣欽若等曰植先封平原侯

臻稱明德美而終不言曹爽輔

政使夏侯玄宣指欲引臻入守尚書令及為弟求婚皆

不許

蜀諸葛亮為丞相後主踐祚以來敏為虎賁中郎將亮在漢中請敏為軍祭酒輔軍將軍坐事去職亮教曰將軍來敏對上官顯言新人有何功德而奪我榮資與之耶諸人共憎我何故如是敏年老狂悖生此怨言昔成都初定議者以為來敏亂羣先帝以新定之際故遂含容無所禮用後劉子初選以為太子家令先帝不悅而不忍拒也今上即位吾闇于知人遂復擢為將軍祭酒違議者之審見背先帝所疏外自謂能以敦勵薄俗

帥之以義今既不能表退職使閉門思愆

吳顧雍大帝時為丞相平尚書事于公朝有所陳及詞
色雖順而所執者正帝嘗令中書郎詣雍有所咨訪若
合雍意事可施行即與相反覆究而論之為設酒食如
不合意雍即正色改容默然不言

陸凱為丞相時殿上列將何定佞巧便辟貴幸任事凱
面責定曰卿見前後事主不忠傾亂國政寧有得以壽
終者邪何以專為奸邪穢塵天聽宜自改勵不然方見

卿有不測之禍矣定大恨凱思中傷之凱終不以為意
乃心公家義形于色表疏皆指事不飾忠懇內發

晉王祥在魏為太尉陳留王咸熙元年司馬文王既進
爵為王祥與司徒何曾司空荀顗並詣王顗曰相王尊
重何侯與一朝之臣皆已盡敬今日便當相率而拜無
所疑也祥曰相國位勢誠為尊貴然要是魏之宰相吾
等魏之三公公王相去一階而已班列大同安有天子
三公可輒拜人者損魏朝之望虧晉王之德君子愛人

以禮吾不為也及入顓遂拜而祥獨長揖王謂祥曰今日然後知君見顧之重

衛瓘武帝時為司空領太子少傅時惠帝在東宮朝臣咸謂太子純質不能親政事瓘每欲陳啟廢之而未敢發後會宴凌雲臺瓘托醉因跪帝牀前曰臣欲有所啟帝曰公所言何耶瓘欲言而止者三因以手撫牀曰此座可惜帝意乃悟因謬曰公真大醉耶瓘于此不復有言賈后繇是怨瓘瓘男宣尚公主數有酒色之過楊駿

素與瓘不平駿復欲自專權以為宣若離昏瓘必遜位
于是遂與黃門等毀之諷帝奪宣公主瓘慚懼告老遜
位乃下詔進位太保以公就第有司又奏收宣付廷尉
免瓘位詔不許帝後知黃門虛構欲還復主而宣疾亡
王導為司空加守尚書令時元帝愛琅瑯王褒將有奪
嫡之議以問于導導曰夫立子以長且紹又賢臣欽若
等曰紹
也明帝不宜改易帝猶疑之導旦夕陳諫故太子卒定及
成帝時進位太傅拜丞相帝舅庾亮字元規以望重地

逼出鎮江州亮雖居外而執朝廷之權既據上流擁強兵趨向者多歸心導內不能平嘗遇西風塵起舉扇自蔽徐曰元規塵汚人

後魏古弼太武時為尚書令參政事時上谷民上書言苑囿過度民無田業減大半以賜貧人弼覽之入欲陳奏遇太武與給事中劉樹恭志不聽事弼侍坐良久不獲申聞乃起于太武前捽樹頭掣下牀以手搏其耳以拳毆其背曰朝廷不治是爾之罪太武失容放恭曰不

聽奏事實朕躬樹何罪置之弼具狀以聞太武奇弼
公直皆可其所奏以與百姓弼曰為臣而逞其志于君
前者非無罪也乃詣公車免冠徒跣自劾請罪太武遣
使者召之

源賀為太尉獻文欲禪位于京兆王子推任城王雲進
言不可賀又進曰陛下今欲外選諸王而禪位于皇叔
者臣恐春秋烝嘗昭穆有亂脫萬世之後必有逆享之
譏願深思任城之言獻文從之

高陽王雍孝明初為太傅侍中領太尉詔雍入居太極
西栢堂咨決大政時領軍于忠擅權專恣僕射郭祚勸
雍出之忠怒矯詔殺祚及尚書裴植廢雍以王歸第雍
表曰臣初入栢堂見詔旨之行一由門下而臣出
君行不以悛意每覽傷矜視之慘目深知不可不能禁
制臣之罪一也臣近忝內樞兼居師傅宜保護聖躬溫
清晨夕而于忠身居武司禁勒自在限以內外朝謁簡
絕皇居寢食所在不知社稷安危又不豫出入栢堂尸

位而已臣之罪二也忠規欲殺臣賴在事執拒又令僕卿相任情進黜遷官授職多不經旬片逐賢良專納心腹威震百僚執傾朝臣臣見其如此欲出忠為雍州刺史鎮撫關右在心未行反為忠廢忝官尸祿孤負恩私臣之罪三也先帝昇遐儲宮纂統斯乃君父之常謨臣子之永則加賞之義自古無之忠既人臣受恩先帝喪禍之際竭節是常迎陛下於東宮臣下之常事如其不爾更欲何為而忠意氣凌雲坐要封爵爾日抑之交恐

為禍亂臣以權臣所欲不敢輒違即集王公卿士議其
多少清河王臣懌先帝懿弟識度寬明臨衆唱議非以
勤而賞之憚違權臣之旨望顏而授臣知不可因而從
之臣之罪四也忠秉權門下且居宰執又摠禁旅為崇
訓衛尉身兼內外橫于宮掖臣之罪五也古者重罪必
命三公會期至旬日所以重死刑也先帝登極十有七
年細人犯刑猶寬憲墨朝廷貴仕不戮一人今陛下踐
祚年未半周殺僕射尚書如去一草是忠秉權矯旨擅

行誅戮臣知不能救臣之罪六也臣位荷師相年未及終難恕之罪顯露非一何情以處何顏以生雖經恩宥猶有餘責謹反私門伏聽司敗太后感忠保護之勛不問其罪

北海王祥宣武為司徒公錄尚書時御史中尉甄琛與黃門郎李憑以朋黨被召尚書邢巒窮其阿附之狀琛曾拜官親賓悉集巒乃晚至琛謂巒曰卿何處放蛆來今晚始顧雖以戲言巒變色銜忿及此大相推窮祥等奏

曰臣聞黨人為患自古所疾政之所忌雖寵必誅皆所以存天下之至公保靈基于永業者也伏惟陛下纂聖前暉洞鑒幽隱恩斷近習憲軌惟新大政蔚以增光鴻猷于焉永泰謹按侍中領御史中尉甄琛身居直法糾摘是司風邪響黷猶宜劾糾况趙修奢暴聲著內外侵公害私朝野切齒而琛嘗不陳奏方更往來綢繆結納以為朋黨中外影響致其談譽今布衣之父超登正四之官七品之弟越陟三階之祿虧先皇之選典塵聖明


之官人又與武衛將軍黃門郎李憑相為表裏憑兄叨
封知而不言及修蒙彰方加彈奏生則附其形勢死則
就地排之竊天之功以為己力仰欺朝廷俯罔百司其
為鄙詐于茲甚矣不實不忠寔合黜貶謹依律科從請
以職除其父中散實為叨越雖皇族帝孫未有此例既
得不以倫請下收奪李憑朋附趙修是謂交遊之道不
依常度或最昏從就或吉凶往來至乃身拜其親妻見
其子每有家事必先請託緇點皇風塵鄙政化此而不

糾將何以肅整阿諛獎勵忠樸請免所居官以肅風軌
奏可琛遂免歸本郡左右相連死黜者二十餘人

北齊庫狄干文宣天保中為太宰干尚神武妹樂陵長
公主以親地見待自預勤王嘗摠大衆威望之重為諸
侯最而性嚴猛曾詣京師魏譙王元孝友於公門言戲
過度干正色責之孝友大慚時人稱善

隋蘇威為納言從煬帝征遼東領右禦衛大將軍楊玄感
之反帝引威于帳中懼見于色謂曰此小兒聰明得不

為患耶威曰玄感麓疎非聰明者必無慮但恐寢成亂階耳
勞役不止百姓思亂欲以微諷帝意竟不悟



冊府元龜卷三百十六